

**Tun M utus surat kepada Panglima ATM**  
**SINAR HARIAN**  
**2 MEI 2018**  
**JANATUL FIRDAUS YAACOB**

PUTRAJAYA – Tun Dr Mahathir Mohamad menyeru seluruh anggota tentera membuang undi tanpa ada sebarang dorongan atau kekangan daripada mana-mana pihak.

Beliau dengan penuh harapan menyarankan agar panglima dan pegawai memerintah anggota Angkatan Tentera Malaysia (ATM) di bawah naungan pemerintahan agar mengundi dengan telus.

“Adalah menjadi tanggungjawab kepada setiap rakyat termasuk anggota tentera memilih kerajaan yang bertanggungjawab, beramanah dan berintegriti.

“Sempena PRU14 ini, saya dengan penuh harapan menyarankan agar panglima dan pegawai memerintah dapat menggalakkan anggota di bawah naungan dan pemerintahan Tan Sri, Datuk, Tuan agar dapat membuang undi tanpa ada sebarang dorongan atau kekangan daripada mana-mana pihak. Mereka hendaklah diberi kebebasan untuk memilih,” katanya dalam satu surat yang dituju khas kepada Panglima Angkatan Tentera Malaysia.

Dr Mahathir menulis, ATM merupakan sebuah organisasi yang terunggul di negara ini.

Justeru, perlulah sentiasa didengari dan dilihat sebagai sebuah organisasi yang profesional selaku benteng terakhir bagi menjamin keselamatan dan pertahanan Malaysia.

“Saya menyeru agar warga angkatan tentera serta isteri masing-masing dapat membuang undi secara adil dan bijaksana demi keselamatan negara tercinta ini,” tulisnya.

**© 2018 All Rights Reserved •Karangkraf Group Media • © 2018 Hakcipta Terpelihara • Kumpulan Media Karangkraf**

Source: <http://www.sinarharian.com.my/politik/tun-m-utus-surat-kepada-panglima-atm-1.829372>